

# Poldi Timotidok pepa timen youliminguk

## Yodakale Mede

Pepa yon adi Poldi Timotidok mede timentimen youliminguk. Timoti adi Listala niŋ, yokwet uyadi Galesiya maanen. Eŋ miŋ adi Juda tam kaŋ beu adi Gilik me. Ala timen Timoti adi Pol dut nonŋon hatiŋila Wapum'walaŋ Mede Momoon yohauta yaugumuk, ala mindaŋkade Timoti adi Pol bikabuŋa woon Efeso kwetneŋ hati kwanainelune Poldi pepa i youliminguk. Pol adi Timotidok pepa i youlimiŋa gawaŋbopŋiye momoonŋon yabudokowekdok nindoko tuguk. Tiyauge yalaŋ-me niŋdi mintaŋ gawaŋbopŋiye yehitubugiyondaan nadisukilitihik tubukadakawaakneŋ doktiŋa nindoko tuguk. Tiŋa unduŋon ne maŋ Wapum'walaŋ kwanai-me momoon hatiŋila kwanaiŋiŋ u momoonŋon hinek kadokoŋ tuluwaak yon niŋkilitiguk.

---

## Youtumba mede

**1** <sup>1</sup>Nu Pol, nu Kilisto Jesu'walaŋ Aposeldi mede i youkamulat. Jesu Kilistodok nadikunakunale tiyam, adi tiŋa Bepaŋ Tubulodanikdi Aposel kwanai titiŋdok yon nanindapmagumuk. <sup>2</sup>Timoti, du adi metam nadisukilitihini hatiyamneniŋ mihine hinek, dutok pepa i youkamulat. Baŋ Bepaŋ eŋ Wapumnik Kilisto Jesu'walaŋ silon tobogon, be welekulema, eŋ kulemadi dukut hatuwaak.

## Poldi Timoti kwanai titiŋdok niŋkiliti tuguk

<sup>3</sup>Nu Masedoniya kwetneŋ wene tiŋila mede ganiŋgut unduŋ tiŋa Efeso yokwetneŋ unŋon koti tomboyoula hatiŋa me noli mede yotubufit kwanai tiŋa metam nadisukiliti talik moiniŋ yenindidimein u yenihep tubune wabi tineen. <sup>4</sup>Adi yadi kahat fifit yon me bebet indigon mintaŋ hatitalabugiŋ diniŋ kahat kweheyehi be hebethik kweheyehi yoin inŋon yofifile tiŋa mon kaŋ tosiwe hati-tiin. Unduŋ tiŋa Bepaŋ'walaŋ silon tobogon diniŋ hebet nadisukiliti gineŋ hatak u uyakut tiŋa kiyokiyo hati-tiin. <sup>5</sup>Ala du yadi kwanai indin titiŋdok ganilat: Metam yehitubu-lodaune

nadisukiliti folooj hinek tiņa welelih walaņiņ hatiņa yomnit mokit tiņila nohiye yabukahile hinek tiyaneņ. <sup>6</sup>İngooj mebop noli adi titiņ momooj i bikabuņa mede foloojnit mokit tubumintagiņ uņak kamehatiņi. <sup>7</sup>Unduņ tiņa nehitoک indiņ yoiņ, “Indi adi Moses’walaņ Yodoko Mede hinale.” Unduņ yoņa medehik gigne tiņa yohautaiņ ingooj mebiņiņ u nehi mu nadidakaleeņ hogok yofit hati tiņ.

### **Yodoko Mede adi metam titiņ hogohi tiņ aditok**

<sup>8</sup>Indi Yodoko Mededok indiņ nadiyam. U mede kedem, ala mebi nadidakalehinakaaņ moņgo hatidok. <sup>9</sup>Mebi adi indiņ hatak. Yodoko Mede adi metam didimehidok mu tilak. Adi indihidok: me kadakahi, wombuņolohi, titaboloņet titiņ, eņ Bepaņ sigilulum timiņa kadakaniņ tihatiņ, eņ welelih geņgeņhinit, Bepaņ’walaņ hatihatidok yopekıt tiņ, mehim-behiye udihikumiņ, me udihikumufıt tiņ, <sup>10</sup>metam kefile tiņ, be medigoņ me nohiyedut Sodomhi me’walaņ titiņ hogoli u tiņ, be meeniņ kubo yanagila wooņ nolidut muneeņdok kibikibi tiņ, metam mede yalaņ yoiņ, eņ Wapum wou foloņ yokwambunda yalayalaņ tiņ, tiņa titiņ nolidi Mede Momooj u mik timiņ. Titiņ hogohogok i kunali fomun u tiņ heki aditok nadiņa Yodoko Mede u yoņit. <sup>11</sup>Mede biyagoņ yoņ adi Bepaņdi Mede Momooj yohautawıt yoņa naniņguk, wendok tuwolıt hinek. Mede Momooj wendi indiņ ninimbihitak, Bepaņ ne adi hatihati momooj diniņ molom eņ wougıt adi saņiņiņnit eņ loloņnit hatilak.

### **Bepaņdi Jesu’walaņ kedem doktiņa ninigitak**

<sup>12</sup>Wapumnik Jesu Kilisto adi saņiņiņ namuņa nehıtu-bu-kilitiguk doktiņa niutumbalat. Adigoņ nadisukilitine kanadiune tuwot tubune kwanaiņiņ titiņdok naniņdapmaguk. <sup>13</sup>Nu koom Jesu wou nintıfooņ kayoņboņiye memik tiyemiņa widiņiņa yehıtu-bu-figita tulugut, ingooj kibi adi momooj unduņ tinamguk. Nu uņaniņ Wapumnik diniņ mebiņiņ mu nadidakalegut tiņa nadisukilitinenit mokit hatiņila unduņ tugut doktiņa adi welekulema tinamguk. <sup>14</sup>Kaņ Wapumnik’walaaniņ siloņ tobogoņdi nu’walaņkade fotokiune Kilisto Jesu gut galiņa adi nadisukilitimiņa welenedi metam noli yabukahilegut.

<sup>15</sup>“Kilisto Jesu adi metam kadakaniņ titiņ indi nihıtutumbawene kwetfoloņ foguk.” Mede woņ adi folooj hinek kuyooj. Wendoktiņa metam hogohogok indi adi mede u nadisukiliti titiņdok. İngooj nu adi biyaku metam noli yalakapmeeņ kadakaniņ wapum hinek tugut <sup>16</sup>wendoktiņa Bepaņdi Kilisto Jesu’walaņ welekulemaņiņ dapmandapmaņnit mokit halimilak wendiņi mebi tubuhauta tibe nadiņa kadakaniņne wapum u tumolokutnamguk. Adi kadakaniņne yabuņa gehiņgehiņ mu nehikelekukuk. Adi yadi tobo kulemaņgoņ, eņ baigoņbaigoņ tiņa nehıtu-bu-lodaguk. Kaņ metam mindaņkade hatineeņdi nu’walaņkade

kudi mintaguk u kaŋ adi maan nadisukilitimiŋa hatihati fafaŋeniŋ kahileneeŋ.

<sup>17</sup>Hatihati fafaŋeniŋ diniŋ Mapme loloŋnit u nintilonim! Adi kumuŋ mu tilak, eŋ hebiŋiŋ hatibu mu kayam. Bepaŋ kubugoŋ hogok adi wougigit saŋiniŋnit eŋ filimpipitnit haliwoon halaak fafaŋeniŋ. U biyagoŋ.

### **Jesu'walaŋ Mede Momoon doktiŋa mik momoonŋoŋ titiŋdok**

<sup>18</sup>Timoti, mihine, koom dutok kigili mede mintaguk wendok tuwolit ganindakaleŋit, uŋakoŋ kamegamulat. Du u kamehatiŋa fafaŋeŋ Jesu'walaŋ mededok mik momoonŋoŋ tuluwaan. <sup>19</sup>Tiŋa nadisukilitige fafaŋeniŋ halune walage kadokoune walaŋiŋ hatuwaak. Metam noli welehik maaneŋ walaŋiŋ hatihati u sigilulum timiŋgiŋ doktiŋa nadisukilitihik fiyakulune talik tubufikiŋ. <sup>20</sup>Adi'walaaniŋ niŋ Haimeniya eŋ noli Alesanda, ala adi nadidakale momoon tubumintaŋ Bepaŋ kotigoŋ mu nintubukadakadok yoŋa Sadaŋ kohoŋ foloŋ yapmegut.

### **Ninadidok mede**

**2** <sup>1</sup>Timeŋ hinek tububihila nemek tibaanŋdok gigineŋ ganindakalewit adi indiŋ: Du metam yenimbune ninadi kwanai tinene Bepaŋdok welemomoon nadiŋa niutumba tiŋa hidetok be metam kwetkwet hatitawiŋdok wanakaŋ nadisuŋa kasop tiyemiŋa ninadiyaneŋ. <sup>2</sup>Tiŋa gapman diniŋ me mapme be gapman me wapuhi wanakaŋ yehikasopneŋ Bepaŋ ninadiyaneŋ. Kaŋ adibo nibudokoune Bepaŋ'walaŋ titiŋ takaliŋa kulema foloŋ kulemaŋgoŋ eŋ didimeneŋgoŋ hatiyaneeŋ. <sup>3</sup>Unduŋ tiŋa hatinene Tubulodanik, Bepaŋ, adi wendok nadiune utumbaluwaak. <sup>4</sup>Adi yadi metam wanakaŋ hogohogok kedebadapmaan mede foloŋ hinek u nadidahi titiŋdok-ku yolak. <sup>5</sup>Bepaŋ kubugoŋ hatinimilak. Tiŋa undugoŋ Bepaŋ be metam lekiŋgoŋnik foloŋ Kilisto Jesu me hinek tuguk adi kubugoŋdi Bepaŋgut nihitomboyoula hatinimilak. <sup>6</sup>Adi naiŋiŋ foloŋgoŋ hatihatiŋiŋdi metam hogohogok kadakanŋ ginenŋ nihituwaguk. Ala wendiniŋ Mede Momoon di naiŋiŋ foloŋgoŋ hautaguk. <sup>7</sup>Kaŋ nu wendiniŋ Medeŋiŋ yohautait yoŋa Aposel napmeguk. Unduŋ doktiŋa metam Judahi'walaŋ feknit mokit, adi mede foloŋ hinek eŋ nadisukiliti diniŋ mebi yenindidimedok yoŋa hinale kwanai titiŋdok naniŋguk. Mede yoŋ adi yalaŋ moŋ, biyagoŋ hinek yolat.

### **Titiŋ didimeneŋ tinene Bepaŋdi nibukahilewaak**

<sup>8</sup>Nu mewoi yokwet uŋoŋ be uŋoŋ hatiŋiŋ adi indiŋ tineŋ yoŋa mede i ganilat. Adi didimeneŋgoŋ hatiŋila kwihitaŋ tosiwe mu tiŋa kohohik wahinŋkade kihiwali Bepaŋ ninadiyaneŋ. <sup>9</sup>Eŋ tamwoidok adi indiŋ yolat. Adi yadi dahidahi kedahi tinahukula hatiyaneeŋ. Ale tamwoi, i

maan nadiut. Kihik hapmuŋ foloŋ tikudikudile be kodihik foloŋ komkom tuwanjŋ loloŋnit homogine homogine be dahidahi pepelendahi kadahiŋa yaune yabusiloda titiŋdok kadahiŋ undihi adi mu kadahiyaneeŋ.

<sup>10</sup>Tamwoi, hidi Bepaŋ'walaŋ mede takaline kaŋ adi titiŋ momohi tubune utumbaluwaak.

<sup>11</sup>Tamwoi adi nehitoŋ nadiune founne mede kabup ilaŋa Bepaŋ'walaŋ mede moŋgokaneeŋ. <sup>12</sup>Tamdi mewoidok talitimeŋ tiyemdok be mewoi Bepaŋ'walaŋ mede yenindidimedok adi mu nadiyemilat.<sup>a</sup> Adi adi kabup ila Bepaŋ'walaŋ mede nadiyaneeŋ. <sup>13</sup>Mede woŋ adi indiŋ doktiŋa yolat. Adam timenŋ tubumintaŋ Ewa mindaŋ tubumintaguk. <sup>14</sup>Tiŋa Adam adi tikamanda molom medeŋiŋ mu nadimeŋguk. Tam adigili nadimeŋa mede wobu tuguk. <sup>15</sup>Mede wobu tuguk iŋgoŋ oŋ, tamwoi adi wapmihi yanagitune Bepaŋdi yehitubu-lodaluaak. Tiŋa helemahelamaŋ Kilisto nadisukilitimeŋa uŋgoŋiŋ hatineenŋ, eŋ metam noli yabukahilekahile tiŋa nadidakalehinit eŋ walaŋiŋ hatineenŋ adi Bepaŋdi yabukahilewaak.

### Talitimeŋ diniŋ mede

**3** <sup>1</sup>Me niŋ adi Bepaŋ'walaŋ kayoŋbop diniŋ kadokome titiŋdok nadikwambundalak adi yadi kwanai loloŋnit titiŋdok dakalelak. Mede woŋ adi biyagoŋ hinek. <sup>2</sup>Kayoŋbop diniŋ kadokome adi indiŋ hatibune utumbaluwaak:

adi metam dauhik gineŋ yomnit mokit hatiŋila tam kubugoŋdut hogok hatiluwaak.

welenŋdi nemek hogohidok dokoniŋgoŋ hatiluwaak.

tiŋgiyoŋgiyone mu tiŋa didimeŋiŋgoŋ hatiluwaak.

ne'walaŋ hatihati momooŋgoŋ hinek kaulidokolak.

me siloniŋ tuluwaak.

didimeŋiŋgoŋ hatibune metam nolidi kaŋ nadiune utumbaluwaak.

hinale momooŋ maŋ tuluwaak.

<sup>3</sup>ime fafaŋeniŋ kisaŋ mu naluwaak.

mik pilap mu tuluwaak.

adi baigoŋ kulemaŋgoŋ hatiluwaak.

tiŋa undugoŋ welenŋdi muneenŋ wapum moŋgotdok mu nadiluwaak.

<sup>4</sup>adi ne didimeŋiŋgoŋ hatiŋila ne'walaŋ wapmihi-tam kedemgoŋ yabudokoŋ wapmihiŋiye yehitubu-didimeune gikiŋgoŋ timiŋa medeŋiŋ nadiŋa hatiyaneenŋ.

<sup>5</sup>Be adi ne'walaŋ wapmihi-tam kedemgoŋ mu yabudokowaak adi kadoko kwanai diniŋ mebi dedinŋ tiŋa nadididimeenŋ Bepaŋ'walaŋ

<sup>a</sup> 2:12 Kwanai tam be tubuloda tam adi me loloŋhinit gikiŋgoŋ tiyemiŋa medehik nadiŋ doktiŋa me wapuhidi nadiyembune tuwot tubune mede yohauta metam bop gineŋ kedem titiŋdok.

kayonbop diniñ behik tiña yabudokowaak. <sup>6</sup>Niñ indin, nebek niñ adi kayonbop maaneñ kobugon tomboyokuk adi yadi kayonbop diniñ kadokome pilap mu mintawaak. Tiyaugene undiniñdi sigitiñalo tubune Bepañdi Sadañ kelekukuk undugon adi maan kelekulaakneñ ala. <sup>7</sup>Me talitimeñ hatidok adi metam Bepañ'walañ kayonbop gineñ mu tomboyokiñ adi maan kaune tuwot tilak undiniñ kameune hatiluwaak. Metam kayonbop mu tigiñ undihidi nintijafo tubune Sadañdi weleñ tubufileune adi'walañ talamutdi begeh wele ulaakneñ.

### **Tubuloda me diniñ mede**

<sup>8</sup>Kayonbop diniñ tubuloda me heki adi maan undugon me didimehi hatiyaneñ. Mebelemhik lufom adi mu monggo hatiyaneñ. Ime fafañehi kisañ mu nayaneñ. Adi muneñ wapumdok nadigalika mu taneñ. <sup>9</sup>Adi yadi yomnit mokit tiña welehiñ adi walañiñ hatija nadisukiliti mede, kabup hebihali buge buge mintadakaleguk u welehiñ maaneñ nadidahi tiyaneñ. <sup>10</sup>Adi timentimeñ yeniñkulune kwanai titatika taneñ. Ala kwanaihik kaune tuwot tubune kayonbop maaneñ kwanai foloon titiñdok yenindapmaan yapmeyaneñ. <sup>11</sup>Kañ tubuloda me tamhiye be kwanai tam adi maan didimeneñon hatiyaneñ. Adi yadi metam yeniwoliwolike mu tiyaneñ. Adi tobo welehiñdi didimeneñon nadisuña hatija mede yoyohik be titiñhik didimeneñon tubune foloonnit hogok tuluwaak. <sup>12</sup>Tiña kayonbop diniñ tubuloda me adi undugon, tam kubugon dut hatija wapmihi-tam be meñimeñiye momoonon yabudokoluwaak. <sup>13</sup>Unduñ tiña adi kwanai momoon tubune nadimimbune utumbaune wougigit momoon mintawaak. Unduñ tiña Kilisto Jesu nadisukilitimiña kwanaiñiñ titiñdok lodahinaka tibaak.

### **Bepañ'walañ mede hebiniñ diniñ mebi**

<sup>14</sup>Nu du'walañkade agañ pilap uuñdok nadilat iñgon indin doktiña yodidime mede i youkamulat. <sup>15</sup>Tiyaugene nemek niñdi nehigiyamneune pilap mu bene Bepañ'walañ kayonbop dediñ hatidok wendiniñ mebi mu nadiña nadibedi tibaaneñ yoña pepa i youkamulat. Biyagon kuyon, Bepañ'walañ metamñiye adi Hatihati Molom diniñ kayonbop. Kañ kayonbop wendi taka kobumuñ nabugon unduñ tiña mede biyagon u ulihiune hatak. <sup>16</sup>Mede Momoon kabup hebihali buña mintadakaleune nadisukilitiyam wendiniñ mebi adi fuliñgon hinek. Mede won adi indin yohautane magaligalik hinek tilak:

Adi me hinek mintaune metamdi kagiñ.

Erj Uñgoniñ Munabulidi mebiñiñ tubumintaune aņelo hekidi kagiñ.

Erj kwetkwet metam gigitñiñ yenhautaune nadisukilitimiñiñ.

Kañ Bepañdi nagilu kunum gineñ loon wougigitñiñ loloñnit tuguk hatilak.

### Nai Wapum dulalune yalaŋ-me fee mintaneŋ

**4** <sup>1</sup>Uŋgoniŋ Munabulidi indii miŋgoŋ yohautalak: hatigene mindaŋkade metam noli adi nadisukilitihik u bikabuŋa munabut hogohi diniŋ yalaŋ mede eŋ Sadaŋ'walaŋ yabap moihi diniŋ yalaŋ mede nadiune galikitnit tubune uŋandiŋ wooŋ galineŋ. <sup>2</sup>Me yalaŋ-me, kayoŋbop namandap hatiŋ hekidi metam yalaŋ mede u yenihautaneŋ. Adi yadi agaŋ yalaŋ-medi welehek tubususugup tuguk doktiŋa yalamula indii yenineŋ: <sup>3</sup>“Hidi hekimalam mu tiŋa hogok hatiyaneŋ,” eŋ “Nanaŋe noli mu naaŋ hogok toboniŋ hatiyaneŋ.” Iŋgoŋ oŋ, nanaŋe hogohogok adi Bepaŋdi momohi boiguk doktiŋa metam mede biyagoŋ nadiŋa Bepaŋ nadisukilitimiŋdi niutumbaŋ nanaŋdok yoguk. <sup>4</sup>Bepaŋ'walaŋniŋ nemenemek mintaguk adi momohi hogok. Ala yonadifo tiŋa niutumbaŋ nanaŋdok be titiŋdok, ale maŋgoŋde moŋ yodok. <sup>5</sup>Woŋ adi agaŋ Bepaŋ'walaŋ mede eŋ ninadinik wendi yehisidokolak doktiŋa Bepaŋdi yabune momohi tiŋ.

### Jesu Kilisto'walaŋ tipilapilaye-me momooŋ hatiluwaŋ

<sup>6</sup>Ale du mede u metam nadisukilitihinit yeniyehitubu-didime tibaŋ. Unduŋ tibaŋ adi du Jesu Kilisto'walaŋ tipilapilaye-meŋiŋ momooŋ hatibaŋ. Unduŋ tiŋila da'niŋ nadisukiliti be Mede Momooŋ nadidahi titalabugun wendi gehitubu-kilitiune hatibaŋ. <sup>7</sup>Du yadi metam nolidi molodagi be kwetfoloŋ diniŋ mede folooŋhinit mokit, sigihi-labuhi yohatiŋ u mu nadiluwaŋ. Du yadi Bepaŋ'walaŋ hatihati u kahileŋ titiŋŋiŋ titiŋdok tiulidokoŋ lodaloda kwanai tuluwaŋ.

<sup>8</sup>Eŋ niŋ indii. Kwetfoloŋ iŋoŋ siginik tubulodadok nangat tubukaika u kedem titiŋdok, iŋgoŋ welenik tiulidokoŋ Bepaŋ'walaŋ hatihati takaliŋa tibaŋ wondi folooŋ hinek tilak. Wondigoŋ kwetfoloŋ iŋoŋ nihitubulodalak, eŋ kougoŋ hatigene kunum gineŋ hatihati tubumintanimbaak. <sup>9</sup>Mede yoŋ adi folooŋ hinek ale wanakaŋ nadikahile titiŋdok. <sup>10</sup>“Indi Bepaŋ hatihati molom adi'walaŋkade nadiulodiŋa tiyam. Adi metam kwetkwet hatiŋ wanakaŋ yanagitdok saŋiniŋ halimilakdi metam nadisukiliti timiyam indi yadi nibukahile hinek tiŋa ninigitak.” Wondiniŋ folooŋ moŋgotdok adi siyogigi kwanaineyam.

### Bepaŋ'walaŋ kwanai diniŋ siloŋ u gitagoŋ kadokodok

<sup>11</sup>Mede yolat hogohogok u yeniyehitubu-didime tibaŋ. <sup>12</sup>Du mekuya hatilaŋ doktiŋa metam biyabune dutok nadigambune fofonit adi mu tuluwaak. Du yadi welesiloŋgenit, eŋ nadisukilitigenit eŋ walaŋiŋ hatiŋila titiŋge be mede yoyogedi metam nadisukilitihinit talik yenindakaleune nadineŋ. <sup>13</sup>Nutok woomnamuŋila Bepaŋ'walaŋ Youkudip Mede kunayemiŋa weleyouyout tiyemiŋa yenindidimewaŋ.

<sup>14</sup>Tiņa talitimenj hekidi kigili mede yoņa kohohik kige foloņ boiune Bepaņdi kwanaidok siloņ ganguk doktiņa wendok foloņ gweheye mu tiņa fafaņeņ yali kwanai tuluwaanj. <sup>15</sup>Tiņa du kwanai u momoongonj hinek kaulidokooņ gagine tiņa tubune kwanaige diniņ folooņ gibitaņ mintauene metamdi kaņ nadineeņ. <sup>16</sup>Du da'walaņ hatihatige be metam yeniyehitubu-didime kwanai tilaņ u momoongonj kadokoņila kwanaineluwaanj. Du fafaņe tiņa unduņ tubune Bepaņdi kwanaige wendoktiņa da be, be metam medege nadiiņ, hidi wanakaņ hanagilaak.

### Metam yenindidime diniņ talii

**5** <sup>1</sup>Me gawadaņ niņ mede nimbene nadiņa fafaņeņgoņ mu niluwaanj. Me undiniņ adi me baņ niņa kulemaņgoņ nindidimeluwaanj. Eņ mekuyahi adi datneye be kwayaneye yeniņa yenindidime tuluwaanj. <sup>2</sup>Kaņ tam gawadahi adi maneye yeniņa mede kulemaņgoņ yoņa yenindidimeluwaanj. Tam waabihem adi witneye yeniņa da'niņ nadinadisuge didimeneņgoņ kadokoņila mede yeniluwaanj.

### Tam kahat yehitubu-lodadok mede

<sup>3</sup>Eņ tam kahat adi yehitubu-lodaņ medehik nadiyemiņa yabudokoluwaanj. Mede yoņ adi nediyeņ tam kahat hinek hatiiņ aditok hogok yolat. <sup>4</sup>Tam kahat niņ adi mihiņiye be wabiņiye be laņiye uņgoņ hatiiņ adi yadi timenj Bepaņ'walaņ nadinadi keleeņ nedigoņ nehi'walaņ yohineņ itowiņ u timenj siloņ tiyemiņa yehitubu-lodayaneeņ. Woņ adi koom wapmihineņ siloņ tiyemiņa yabu-ulidokoune hatiņa bedigiņ wendok kibibo uņakoņ tiyemaneeņ. Unduņ tubune Bepaņdi nadiyembune utumbaluwaak.

<sup>5</sup>Tam kahat folooņ hinek adi ne hogok hatiņila Bepaņ'walaņkade ulodiņa hatilak, eņ helebufa tuwot Bepaņdi tubulodadok nadisuņa helemahelamaņ ninadilak. <sup>6</sup>Eņ tam kahat niņ siloda kwanai tibaak adi yadi sigiņ kaipmuņ iņgoņ weleņ adi kumiņ hatilak unduņ niniņdok. <sup>7</sup>Mede yoņ adi yenihinaka tubune nadiņila metam dauhik gineņ yomnit mokit hatiyaneeņ. <sup>8</sup>Nebek niņ adi ne'walaņ wapmihi-tam be mimbeu be meņimeņiye mu yabudokooņ yehitubuloda mu tibaak adi yadi Mede Momooņ nadisukilitidok tali u bikabuņa nadisukilitihinit mokit'walaņ titiņ u kalakapmeeņ titiņ kaulenj hinek tilak niniņdok.

<sup>9</sup>Tam kahat niņ adi guletņiņ 60 dapmaguk, eņ me kubugoņdut didimeneņgoņ hatiguk, tam undiniņ hogok kadokodok wou youlaaņ.<sup>b</sup> <sup>10</sup>Tiņa adi'walaņ titiņiņ kedem tilak wendiniņ mebi kanadi titiņdok

<sup>b</sup> 5:9 Tam kahat wohiye youtdok yoguk adi mebi indij doktiņa yoguk. Koom kayoņbop hekidi muneeņ bomboņ be nanaje bopneune daneeņ tam kahat yemaņiņ doktiņa wohiye youtdok yoguk. Aposel 6:1-2.

indij yonadiwaan. Adi wapmihi kedembe yabudokoluguk? Me nalum yoliner bagin kan maanbe heyemiņa yapmeņ ituguk? Bepaņ'walaņ kwanai-metam siloņ maanbe tiyemuluguk? Metam malabumuņ giner hatilune maanbe yehitubu-lodaluguk? Siloņ kwanai-mebimebi hatak u maan kedembe tuluguk? Mebihik adi unduņ hinek-ku nadidok.

<sup>11</sup>Tam kahat gibitahi adi Kilisto nadilakata timiņa me kotigoņ titiņdok nadieneņ, unduner doktiņa adi'walaņ wohiye adi mu youlaaņ. <sup>12</sup>Tam undihi adi me kotigoņ titiņdok nadiņa mede yofafaņe timer tigiņ u lahulune yomnit tilak.<sup>c</sup> <sup>13</sup>Tiņa undugoņ kayoņbopdi yabudokoiņ doktiņa hatiliweliweņ tiņa yofofon tiin. Tiņa u hogok moņ, metam noli'walaņ titiņhik diniņ mebi nadiņa mede yoyahamaye tiņa yeniwoliwolike hati tiyawiiņ. <sup>14</sup>Wendoktiņa nu indij yolat. Tam kahat gibitahi adi yohot kotigoņ kedem tiņa wapmihi yahaņeeņ yabudokooņ nanaņe kwanai tiņa moņgotnaņ heyemiņa yehitubu-bediyaņeeņ. Unduņ tubune memikniye adi niniņkadaka titiņdok mede tali lohiņa binibineeņ. <sup>15</sup>Tam kahat nolidi agaņ talik didimeniņ bikabuņa fai wooņ Sadar keleyawiiņ.

<sup>16</sup>Tam nadisukilitinit niņ tiņa meņimeņiye adi'walaņ lekiņgoņhik giner tam kahat niņ hatibune kan uyadi tam nadisukilitinit weņ ne kadokoluwaak. Unduņ tubune kayoņbopdi adi kadokodok malabumuņ mu tubumintaneeņ. Adi tam kahat nehi hogok hinek itowiiņ u hogok kedem yabudokoyaneeņ.

### Talitimeņ heki'walaņ mede

<sup>17</sup>Kadokome hekidi kwanaihi tubune utumbaune tuwahik kiula tiloloyeņ yemaneeņ.<sup>d</sup> Woņ adi Mede Momooņ yoyo me heki be hinale kwanai didimeniņgoņ tiin adi unduņ hinek-ku tiyemdok. <sup>18</sup>Bepaņ'walaņ Youkudip Mede niņ indij hatak. "Hidi makaudi pandiņ gitnem yalifilifiliye kwanai titiņdok naihi foloņ mahik foloņ likdi ulufo<sup>e</sup> mu tiyemaneeņ." Eņ niņ e indij. "Kwanai me adi kwanai tilak diniņ tuwaņiņ moņgolune tuwot tibek." <sup>19</sup>Me kubugoņdi kayoņbop diniņ kadokome niņ mede foloņ kameņdok yobune u mu nadimimbaaņ. Me lufom be lufomkulitniņdi yobune nadiņa wendok adigili mebiņiņ kanadidok kwanaiņiņ tibaaņ. <sup>20</sup>Niņdi yom tubune kan noliņiye namandahik foloņ nintubudidime tubune noliye adi u kan kadakaniņ titiņdok munta tiņa hatihatihik tubudidimeeņ hatiyaneeņ.

### Poldi Timoti niņkiliti tuguk

<sup>21</sup>Nu Bepaņ, eņ Jesu Kilisto tiņa aņeloņiye momohi adi'walaņ namandahik foloņ indij ganiņkilitilat. Mede i ganindidimelat u gitagoņ

---

<sup>c</sup> 5:12 Koom tam kahat heki yehitubu-lodadok talik indij keleyagiņ. Tam kahat hekidi timeņ kotigoņ yohot mu titiņdok yofolok tagiņ. Kan medehik uņakoņ takaliņa nanaņe daneyemagiņ. Wendoktiņa mede i youkuk. <sup>d</sup> 5:17 Tuwahik kiula tiloloyeņ yemaneeņ woņ adi K100 nobu moņgokaneņ kan adi K100 nimaan tomboyoulune K200 tubune yemaneeņ. <sup>e</sup> 5:18 Babot dawi dahiune foņ itak wondok wou "ulufo" yoyam.



en momoŋgoŋ hinek yabudokoune nemu maan fowaak. Unduŋ tiŋa metam hogohogok titiŋ tali kubugoŋ gineŋ tiyembaan. Du titiŋ fofoon u me wapuhi be nokeyedok hogok adi mu tiyembaan. <sup>22</sup>Du metam Bepaŋ'walaŋ kwanai titiŋdok nadiŋa kohoge kihik foloŋ kameeŋ Bepaŋdi siloŋ tiyemdok ninadi kwanai gehiŋgehiŋ adi mu tuluwaan. Me noli'walaŋ kadakanihikdi du foloŋ lowaakneŋ ala da'walaŋ walage be sigige kadokoune walaŋiŋ hatuwaak. <sup>23</sup>Du welefigita en yagiyagit tihatilaŋneŋ doktiŋa ime hogok adi mu naluwaan. Wain ime-kabe maan naluwaan.

<sup>24</sup>Me noli'walaŋ yomhik diniŋ mebi nadinadi nai mu dulalune komtegoŋ mintadakalelak, en noli'walaŋ adi hebihali ugene kougoŋ mintawaak. <sup>25</sup>Tiŋa undugoŋ tubuloda momoŋ kwanai u maan mintadakalelak, en unduŋ mu nobu tuluwek kaŋ wadi kabup hali ugene kougoŋ mintadakalewaak.

### Tipilapilaye metam diniŋ mede yeniŋkiliti

**6** <sup>1</sup>Tipilapilaye metam hatiŋ hogohogok adi yadi bombongihiedok nadiyembune loune yeniutumbaan adi'walaŋ hebehik foloŋ fofonit hatiŋila mahik mede nadiŋa mede tiloloŋ tiyemaneen. Bepaŋ wou be Mede Momoŋ yohautayam u metam nolidi yotifoon yohaŋindaneeneŋ doktiŋa unduŋ taneen. <sup>2</sup>En bombongihie noli Mede Momoŋ nadisukilitiŋ, aditok indiŋ mu nadiyemaneen. “Adi be indi, indi Mede Momoŋ wanakaŋ nadisukilitiyam doktiŋa indi mehekinolit ale.” Unduŋ adi moŋ. Adi tobo indiŋ nadidok. “Bombonginiye adi Wapum nadisukilitimiŋ doktiŋa not tiyemne titiŋnik undiniŋ wendi yehitubulodayam, unduŋ tuluwaak.” Unduŋ yoŋa kulemaŋgoŋ hatiŋa tipilapilaye kwanai u welehikdi nadifo tiŋa tiyembune utumbaluwaak. Timoti, du mede i yeniŋa yeniye hitubu-didimeen yeniŋkilitiluwaan.

### Muneen bombondok siloda mu titiŋdok

<sup>3</sup>Wapumnik Jesu Kilisto'walaŋ mededi Bepaŋ'walaŋ mebi didimeneŋgoŋ en folooŋ hinek ninindidimelak. Ingoŋ me neen adi Jesu'walaŋ mede hogohogok sigilulum timiŋa ne'walaŋ nadinadi u metam yenindidimelak aditok adi indiŋ yodok: <sup>4</sup>Adi nadisuŋiŋ filune sigiŋ tiŋaloŋ mede gineŋ kikalakapmeŋ tiŋa mededok kiyokiyo titiŋdok gigne tilak. Adi me nadiyout hogok tiyemfit tilak. Unduŋ tiŋa me nolidut tosiwe be yotifo mede yofit titiŋdok galikit hinek nadilak. <sup>5</sup>Unduŋ tubune mede wobu kisaŋ mintalak. Me undihi adi nadisuhik fidapmaune mede biyagoŋ-kabe nemu nadiiŋ. Adi yadi muneen bomboŋ mintanimbaak yoŋa Bepaŋ'walaŋ Mede Momoŋ yalayaŋa kamehatiŋiŋ.

<sup>6</sup>Biyagoŋ, indi Bepaŋ'walaŋ titiŋ takaliŋa nemenemek beyam u yabune tuwot tilak wondi welemomoŋ tubumintanimilak. <sup>7</sup>Indiŋ hinek

nadisuyaneem. Meniye adi hambeep ninigikiŋ. Ala hatigene kumuŋa kotigonŋ hambeep iŋgonŋ uneem. <sup>8</sup>Unduŋ doktiŋa nanaŋe be haule bombonŋ dedigonŋ itounimbune nadine tuwot tubune hatiyaneeem. <sup>9</sup>Muneeŋ bombonŋ duhuduhunit titiŋdok nadigigineinŋ adi tikamanda diniŋ begepdi udihiwaak. Kaŋ kwet diniŋ hewehewe galikit mebimebi wendok nadisilodaanŋ kisaŋ nadigigineeŋ kauleŋ hatigene kadakaneenŋ. <sup>10</sup>Muneeŋ bombonŋ diniŋ silodadi kadakaninŋ noli hogohogok diniŋ daŋiniŋ tilak. Metam noli adi wendok kisaŋ nadigalikaanŋ Bepaŋ'walaŋ Mede Momoonŋ nadisukilitidok talik tubufila folofigita nadiŋa bulaninŋgonŋ kisaŋ nadiginŋ.

### **Hatihati fafaŋeniŋ kahiledok gigne tibaanŋ**

<sup>11</sup>Iŋgonŋ Bepaŋ'walaŋ me, du nemek undiniŋ u sigilulum timimbaanŋ. Unduŋ tiŋa kedebawalandaanŋ nadisukilitinit eŋ welesiloŋnit eŋ kulemanŋonŋ hatidok gigne hinek tuluwaanŋ. Unduŋ tiŋa malabumuŋ hogohogok mintagambaak u nadikabeleeŋ Bepaŋ'walaŋ titiŋ didimeninŋ takalidok gigne tuluwaanŋ. <sup>12</sup>Tiŋa nadisukilitidok kwanai momoonŋ hinek tuluwaanŋ. Unduŋ tihatigene hatihati fafaŋeniŋdok gigit tibaanŋ. Du yadi wendogonŋ tiŋa Bepaŋdi ganihamaneguk. Tiŋa agaŋ dagonŋ metam bop gineŋ undugonŋ titiŋdok yokwambundaune nadiginŋ.

<sup>13</sup>Jesu Kilisto adi Pontiyas Pailat namanda foloŋ fafaŋeŋ yali nadisukilitiniŋ diniŋ mebi yodakaleguk. Adi'walaŋ namanda foloŋ eŋ Bepaŋ nemenemek hogohogok hatihati tubumintayemilak adi'walaŋ namanda foloŋ indinŋ ganiŋkilitilat. <sup>14</sup>Du mede momoonŋ ganiŋit u tubugiyonda be tubugeŋgeŋ mu tiŋa didimeŋgonŋ kadokoonŋ takaliŋa hatilune Wapumnik Jesu Kilisto busuwawaak. <sup>15</sup>Wendok nai dulaune Youtumba eŋ Saŋiniŋ Molom, Bepaŋ ne kubugonŋdi talik dilitombune mintadakalewaak. Adi yadi mapme heki'walaŋ Mapme Loloŋnit, eŋ loloŋhinit heki'walaŋ Loloŋnit. <sup>16</sup>Adi kubugonŋdi kumuŋ mu tilak, eŋ hautaŋinŋ gineŋ nebek niŋdi tuwot mu fofonŋdok undineŋ hatilak. Adi yadi me nebek niŋdi nemu kaginŋ be kakaŋdok. Youtumba be saŋiniŋ halimiŋgukdi halimiŋa wooŋ halaak fafaŋeniŋ. Biyagonŋ.

### **Metam muneenŋ bombonŋhinitdok mede**

<sup>17</sup>Metam kwet diniŋ muneenŋ bombonŋ feegonŋ itauyemiinŋ heki adi yadi sigitiŋalo mu titiŋdok munte mede fafaŋeŋgonŋ yenimbaanŋ. Nemek fiili wendok nadiune hatihatihik diniŋ daŋiniŋ tubune uŋonŋ mu yalikwambundaanŋ yatneeŋ. Bepaŋdi duhuduhu tubumintanimbune tinamowodiŋa hatiyam, adi'walaŋkade yalikwambundaanŋ yatneeŋ. <sup>18</sup>Tiŋa undugonŋ yenimbune metam noli yehitubu-lodadok titiŋ momohi fee tiŋa pilap lodaanŋ siloŋ loŋgonŋ tiyaneenŋ. <sup>19</sup>Adi unduŋ tiŋila nemek fee bopneune wendigonŋ daŋiniŋhik unduŋ tibaak, ala kougonŋ yehitubu-lodaune hatihati foloonŋ tubumintaanŋ kahileneenŋ.

**Mede yodapman**

<sup>20</sup>O Timoti, du kwanai momoonj gamunjit u momoonjgonj kadokoonj kamehatiluwaanj. Tiŋa mede fifit eŋ foloonjit mokit me nolidi monjgo hatiŋila “mede fuliŋgonj” yonja Mede Momoonjdok mik timiinj, u sigilulum tiyemiluwaanj. <sup>21</sup>Me noli adi mede wendok gineŋgonj ulodiŋa nadisukilitihik tubufikiŋ.

Bepaŋ’walaŋ silonj tobogonjdi hidi’walaŋkade hatuwaak.